



KOMUNIKADO PA PRENSA

Fecha *Pr-Minister* *Email*
22 di Februari 2014 **Nathalie Martina** **nathalie.martina@ministervvvp.com**

MINISTER BALBORDA A RISIBÍ UN SERTIFIKADO FOR DI ORGANIZATION OF WORLD HERITAGE CITIES (OWHC)

Willemstad –Minister Balborda di Ministerio di Tráfiko, Transporte i Planifikashon Urbano, ku entre otro tin den su kartera “patrimonio mundial”, a risibí un sertifikado di e Organisashon di Siudatnan Patrimonio Mundial den kua ta indiká ku Willemstad a wòrdu kalifiká komo un “member in good standing”.

Kòrsou ta miembro di e organisashon aki, mirando e hecho ku sentro históriko di Willemstad ta un siudat di patrimonio mundial, rekonosé dor di UNESCO. Komo siudat di patrimonio mundial bo por bira miembro di e kadena di siudatnan di patrimonio mundial, ku tin su sede na Canada.

E sertifikado ta un rekonosementu mirando ku Gobièrnu di Kòrsou a partisipá aktivamente na e último 4 reunionnan plenario di OWHC, ku tabata tin na diferente parti di mundu. Tambe ta bon pa para un ratu ketu na kiko ta nifiká ser miembro di e organisashon di patrimonio mundial OWHC.

OWHC tin 250 siudat ku ta miembro, ku ta representá 130 mion di hende rònt mundu. Dor di ta miembro, na promé lugá Kòrsou por kompartí ku tur otro siudatnan ku ta miembro e maneho, konosementu i informashon di Willemstad komo siudat di patrimonio mundial. Tambe Kòrsou por partisipá na kongreso, konferensha seminario i workshop ku e organisashon ta ofresé.

E organisashon tin un website (www.ovpm.org) ku ta sumamente elaborá i ku ta konektá ku diferente instituto renombrá riba tereno di patrimonio mundial. Si tira un bista riba e website, por haña e informashon di Willemstad, Kòrsou riba esaki. Miembresia ta duna e pais tambe e oportunidat di ekstendé relashonnan ku institutonan prestigioso manera World Bank, World Monuments Fund i Getty Institute.

Na 2015 e kongreso bi-anual lo tuma lugá na Arequipa, Perú i Minister Balborda ta eksplorando posibilidat pa hasi un oferta pa e konferensha bin Kòrsou na aña 2017. Nos miembresia "in good standing" ta di suma importansha pa esaki.